

四庫全書薈要

• 乾隆御覽本

集部

欽定四庫全書薈要

集部

御選古文淵登卷十四

御選古文淵鑒卷十四目錄

漢



王吉

諫昌邑王疏

上言得失疏

路溫舒

上尚德緩刑書

魏相

諫伐匈奴書

條便宜奏

陰陽月令奏

趙充國

陳兵利害書

上屯田奏一

屯田奏二

屯田奏三

鄭昌

請定律令疏

張敞

上霍氏封事

劾黃霸奏

自請治盜賊書

賈捐之

請棄珠厓對

匡衡

政治得失疏

治性正家疏

戒妃匹勸經學疏

貢禹

循古節儉奏

言錢幣書

言風俗書

蕭望之

入穀贖罪議

王褒

聖主得賢臣頌

諸葛豐

謝上書

御選古文淵鑒卷十四目錄

御選古文淵鑒卷十四

內閣學士兼禮部侍郎教習庶吉士臣徐乾學等奉

旨編注

漢

王吉

字子陽瑯琊皋虞人好學明經初為昌邑中尉宣帝時為博士諫大夫

諫昌邑王疏

王動作亡節吉疏諫王入立尋廢吉與郎中令龔遂以忠直數諫正

減死為城旦

臣聞古者師日行三十里吉行五十里詩云匪風發兮

匪車揭兮顧瞻周道中心慙兮

檜國匪風之篇慙古怛字

說曰是非

古之風也發發者是非古之車也揭揭者蓋傷之也

之今

發發然者非古有道之風也今之揭揭然者非古有道之車也故傷之

今者大王幸方與

豫名音房預

曾不半日而馳二百里百姓頗廢耕桑治道牽

馬臣愚以為民不可數變也昔召公述職當民事時舍

於棠下而聽斷焉是時人皆得其所後世思其仁恩至

乎不伐甘棠甘棠之詩是也大王不好書術而樂逸游

馮式搏銜

搏促也。子本反。

馳騁不止口倦乎叱咤

咤亦叱字。竹駕反。

手苦於筆轡

筆馬策。止菜反。

身勞序車輿朝則冒霧露晝則

被塵埃夏則為大暑之所暴炙冬則為風寒之所叵薄

叵與偃同言遇疾風則偃靡也薄迫也。

數以奕脆之玉體犯勤勞之煩毒

奕柔也。而究反。

非所以全壽命之宗也又非所以進仁義之

隆也夫廣夏之下細旃之上

廣夏大屋也。旃與氍同。

明師居前勸

誦在後上論唐虞之際下及殷周之盛考仁聖之風習

治國之道訢訢焉發憤忘食日新厥德其樂豈徒銜檟

之間哉休則俛仰詘信以利形進退步趨以實下

今人不

則膝已下
虛弱不實

吸新吐故以練臧專意積精以適神於以養

生豈不長哉大王誠畱意如此則心有堯舜之志體有

喬松之壽

喬松仙人伯喬
及赤松子也

美聲廣譽登而上聞則福祿

其轅而社稷安矣

轅與
臻同

皇帝仁聖至今思慕未怠

皇帝
謂昭

帝也言武帝晏駕
未久故尚思慕

於宮館園池弋獵之樂未有所幸大

王宜夙夜念此以承聖意諸侯骨肉莫親大王大王於

屬則子也於位則臣也一身而二任之責加焉恩愛行

義熾介有不具者於以上聞非饗國之福也臣吉愚竊願大王察之

上言得失疏

是時宣帝頗修武帝故事宮室車服盛於昭帝時外戚許史王氏貴

寵而上躬親政事任用能吏吉上疏言得失

陛下躬聖質總萬方帝王圖籍日陳於前惟思世務將興太平詔書每下民欣然若更生臣伏而思之可謂至恩未可謂本務也欲治之主不世出公卿幸得遭遇其時言聽諫從然未有建萬世之長策舉明主於三代之

隆者也其務在於期會簿書斷獄聽訟而已此非太平之基也臣聞聖王宣德流化必自近始朝廷不備難以言治左右不正難以化遠民者弱而不可勝愚而不可欺也聖王獨行於深宮得則天下稱誦之失則天下咸言之行發於近必見於遠故謹選左右審擇所使左右所以正身也所使所以宣德也詩云濟濟多士文王以寧

大雅文王之詩

此其本也春秋所以大一統者六合同風九

州共貫也今俗吏所以牧民者非有禮義科指可世世

通行者也獨設刑法以守之其欲治者不知所繇以意
穿鑿各取一切權譎自在故一變之後不可復修也是
以百里不同風千里不同俗戶異政人殊服詐偽萌生
刑罰亡極質樸日銷恩愛寢薄孔子曰安上治民莫善
於禮孝經載孔子之言非空言也王者未制禮之時引先王禮
宜於今者而用之臣願陛下承天心發大業與公卿大
臣延及儒生述舊禮明王制毆一世之民躋之仁壽之
域則俗何以不若成康壽何以不若高宗

高宗殷王武丁也享國百

年竊見當世趨務不合於道者謹條奏

趨讀曰趣趣向也

唯陛

下財擇焉

路溫舒

字長君鉅鹿東里人守廷尉史歷官臨淮太守治有異迹

上尚德緩刑書

時宣帝初卽位溫舒上書

臣聞齊有無知之禍而桓公以興晉有驪姬之難而文公用霸近世趙王不終諸呂作亂而孝文為太宗繇是觀之禍亂之作將以開聖人也故桓文扶微興壞尊文武之業澤加百姓功潤諸侯雖不及三王天下歸仁焉

文帝永思至德以承天心崇仁義省刑罰通關梁一遠
近敬賢如大賓愛民如赤子內恕情之所安而施之於
海內是以囹圄空虛天下太平夫繼變化之後必有異
舊之恩此賢聖所以昭天命也往者昭帝即世而無嗣
大臣憂戚焦心合謀皆以昌邑尊親援而立之然天不
授命淫亂其心遂以自亡深察禍變之故廼皇天之所
以開至聖也故大將軍受命武帝股肱漢國謂霍光披肝
膽決大計黜亡義立有德輔天而行然後宗廟以安天

下咸寧臣聞春秋正即位大一統而慎始也陛下初登
至尊與天合符宜改前世之失正始受命之統滌煩文
除民疾存亡繼絕以應天意臣聞秦有十失其一尚存
治獄之吏是也秦之時羞文學好武勇賤仁義之士貴
治獄之吏正言者謂之誹謗過過者謂之妖言故盛服
先生不用於世忠良切言皆鬱於胸譽諛之聲日滿於
耳虛美熏心實禍蔽塞此乃秦之所以亡天下也方今
天下賴陛下恩厚亡金革之危機寒之患父子夫妻戮

力安家然太平未洽者獄亂之也夫獄者天下之大命也死者不可復生鬻者不可復屬

繼古絕字屬連也

書曰與其

殺不辜寧失不經今治獄吏則不然上下相毆以刻為明深者獲公名平者多後患故治獄之吏皆欲人死非憎人也自安之道在人之死是以死人之血流離於市被刑之徒比肩而立大辟之計歲以萬數此仁聖之所以傷也太平之未洽凡以此也夫人情安則樂生痛則思死捶楚之下何求而不得故囚人不勝痛則飾辭以

視之吏治者利其然則指道以明之上奏畏卻則鍛鍊

而周内之

精熟周悉致之法中也

蓋奏當之成

當謂處其罪也

雖咎繇聽之猶以為死有餘辜何則成鍊者衆文致之

罪明也是以獄吏專為深刻殘賊而亡極孃為一切

苟

且也一切權時也

不顧國患此世之大賊也故俗語曰畫地為

獄議不入刻木為吏期不對

畫獄木吏尚不入對況真實乎期猶必也議必不入

對此皆疾吏之風悲痛之辭也故天下之患莫深於獄

敗法亂正離親塞道莫甚乎治獄之吏此所謂一尚存

者也臣聞烏鳶之卵不毀而後鳳凰集誹謗之罪不誅
而後良言進故古人有言山藪藏疾川澤納污瑾瑜匿
惡國君含詬春秋左氏傳晉大夫伯宗之辭詬耻也言
山藪之有草木則毒害者居之川澤之形
廣大則能受于汚濁人君
之善御下亦當忍耻病也唯陛下除誹謗以招切言開
天下之口廣箴諫之路掃亡秦之失尊文武之惠省法
制寬刑罰以廢治獄則太平之風可興於世永履和樂
與天亡極天下幸甚

魏相

字弱翁濟陰定陶人少學易舉賢良
對策高第宣帝時為丞相封高平侯

諫伐匈奴書

元康中匈奴遣兵擊漢屯田車師者不能下上與趙充國等議欲因

匈奴衰弱出兵擊其右地使不敢復擾西域相上書諫上從相言而止

臣聞之救亂誅暴謂之義兵兵義者王敵加於已不得已而起者謂之應兵兵應者勝爭恨小故不忍憤怒者謂之忿兵兵忿者敗利人土地貨寶者謂之貪兵兵貪者破恃國家之大矜民人之衆欲見威於敵者謂之驕兵兵驕者滅此五者非但人事乃天道也間者匈奴嘗有善意所得漢民輒奉歸之未有犯於邊境雖爭屯田

車師不足致意中今聞諸將軍欲興兵入其地臣愚不
知此兵何名者也今邊郡困乏父子共犬羊之裘食草
萊之實常恐不能自存難以動兵軍旅之後必有凶年

此引老子語

言民以其愁苦之氣傷陰陽之和也出兵雖勝

猶有後憂恐災害之變因此以生今郡國守相多不實
選風俗尤薄水旱不時案今年計子弟殺父兄妻殺夫
者凡二百二十二人臣愚以為此非小變也今左右不
憂此乃欲發兵報讎介之忿於遠夷殆孔子所謂吾恐

季孫之憂不在顯吏而在蕭牆之內也願陛下與平昌

侯樂昌侯平恩侯及有識者詳議乃可

平昌侯王無故樂昌侯王武並

帝之舅平恩侯許伯皇太子外祖父也

條便宜奏

相好觀漢故事及便宜章奏以為古今異制方今務在奉行故事而已數

條漢興以來國家便宜行事及賢臣賈誼鼂錯董仲舒等所言奏請施行之上施行其策

臣聞明主在上賢輔在下則君安虞而民和睦

虞與臣娛同

相幸得備位不能奉明法廣教化理四方以宣聖德民多背本趨末或有飢寒之色為陛下之憂臣相罪當萬

死臣相知能淺薄不明國家大體時用之宜惟民終始未得所繇竊伏觀先帝聖德仁恩之厚勤勞天下垂意黎庶憂水旱之災為民貧窮發倉廩振乏餽遣諫大夫博士巡行天下察風俗舉賢良平冤獄冠蓋交道省諸

用寬租賦弛山澤波池

弛放也言不禁障之也波讀曰陂

禁秣馬酤酒

貯積

秣以粟米飲馬也酤酒者糜費深也貯積者滯米粟也

所以周急繼困慰安

元元便利百姓之道甚備臣相不能悉陳昧死奏故事詔書凡二十三事臣謹案王法必本於農而務積聚量

入制用以備凶災亡六年之畜尚謂之急

禮記王制云國亡九年之

蓄曰不足無六年之蓄曰急無三年之蓄曰國非其國也

元鼎二年平原渤海太山

東郡漚被災害民餓死於道路二千石不豫慮其難使

至於此賴明詔振捄乃得蒙更生今歲不登穀暴騰踴

價忽大貴也

臨秋收斂猶有乏者至春恐甚亡以相恤西羗

未平師旅在外兵革相乘臣竊寒心宜蚤圖其備唯陛下
下畱神元元帥繇先帝盛德以撫海內

陰陽月令奏

臣相幸得備員奉職不修不能宣廣教化陰陽未和災

害未息咎在臣等臣聞易曰天地以順動故日月不過

四時不忒聖王以順動故刑罰清而民服天地變化必

繇陰陽陰陽之分以日為紀日冬夏至則八風之序立

萬物之性成各有常職不得相干東方之神太昊乘震

執規司春

木為仁仁者生
生者園故為規

南方之神炎帝乘離執衡司

夏

火為禮禮者齊
齊者平故為衡

西方之神少昊乘兌執矩司秋

金為義

者成成者
方故為矩

北方之神顓頊乘坎執權司冬

水為智智者
謀謀者重故

為中央之神黃帝乘坤艮執繩司下土

土為信信者誠誠者直故為繩

茲五帝所司各有時也東方之卦不可以治西方南方之卦不可以治北方春興兌治則饑秋興震治則華冬興離治則泄夏興坎治則雹明王謹於尊天慎於養人故立羲和之官以乘四時也

乘治也

節授民事君動靜以道

奉順陰陽則日月光明風雨時節寒暑調和三者得敘則災害不生五穀孰絲麻遂少木茂鳥獸蕃民不夭疾衣食有餘若是則君尊民悅上下無怨政教不違禮讓

可興夫風雨不時則傷農桑農桑傷則民飢寒飢寒在身則亡廉耻寇賊姦宄所繇生也臣愚以為陰陽者王事之本羣生之命自古賢聖未有不繇者也天子之義必純取法天地而觀於先聖高皇帝所述書天子所服

第八曰

第八天子衣服之制也於施行詔書第八

大謁者臣章受詔長樂宮

曰令羣臣議天子所服以安治天下相國臣何御史大

夫臣昌謹與將軍臣陵太子太傅臣通等議

蕭何周昌王陵叔孫

通春夏秋冬天子所服當法天地之數中得人和故自

天子王侯有土之君下及兆民能法天地順四時以治

國家身亡禍殃年壽永究

究竟也

是奉宗廟安天下之大

禮也臣請法之中謁者趙堯舉春李舜舉夏兒湯舉秋

貢禹舉冬

四時各舉所施行政事高帝時自有一貢禹也

四人各職一時大謁

者襄章奏制曰可孝文皇帝時以二月施恩惠於天下

賜孝弟力田及罷軍卒祠死事者頗非時節御史大夫

鼂錯時為太子家令奏言其狀臣相伏念陛下恩澤甚

厚然而災氣未息竊恐詔令有未合當時者也願陛下

選明經通知陰陽者四人各主一時時至明言所職以和陰陽天下幸甚

趙充國

字翁孫隴西上邽人沈勇有大略少好將帥之節而學兵法與霍光定冊尊立宣帝

封營平侯為後將軍破羌振旅而還復為將軍衛尉以老致仕卒

陳兵利害書

宣帝書敕讓充國曰皇帝問後將軍甚苦暴露將軍計欲至正月迺

擊罕羌羌人當獲麥已遠其妻子精兵萬人欲為酒泉敦煌寇邊兵少民守保不得田作今張掖以東粟石百餘芻橐東數十轉輸竝起百姓煩擾將軍將萬餘之衆不早及秋共水草之利爭其畜食欲至冬虜皆當畜食多藏匿山中依險阻將軍士寒手足皸痲寧有

利哉將軍不念中國之費欲以歲數而勝微
將軍誰不樂此者今詔破羗將軍武賢將兵
六千一百人敦煌太守快將二千人長水校
尉富昌酒泉侯奉世將娒月氏兵四千人亡
慮萬二千人齎三十日食以七月二十二日
擊罕羗入鮮水北句廉上去酒泉八百里去
將軍可千二百里將軍其引兵便道西並進
雖不相及使虜聞東方北方兵並來分散其
心意離其黨與雖不能殄滅當有瓦解者已
詔中郎將印將胡越欽飛射士步兵二校益
將軍兵今五星出東方中國大利蠻夷大敗
太白出高用兵深入敢戰者吉弗敢戰者凶
將軍急裝因天時誅不義萬下必全勿復有
疑充國既得讓以為將任兵在外便宜有守
以安國家廼上書
謝罪因陳兵利害

臣竊見騎都尉安國前幸賜書擇羗人可使使罕

罕羗姓○

漢上聲

諭告以大軍當至漢不誅罕以解其謀恩澤甚厚

非臣下所能及臣獨私美陛下盛德至計亡已故遣开

豪雕庫宣天子至德

开羗姓

罕开之屬皆聞知明詔今先

零羗楊玉

零音憐

此羗之首帥名王將騎四千及煎鞞騎

五千阻石山木候便為寇

謂依阻山之木石以自保固

罕羗未有所

犯今置先零先擊罕釋有罪誅亡辜起壹難就兩害誠

非陛下本計也臣聞兵法攻不足者守有餘又曰善戰

者致人不致於人今罕羗欲為敦煌酒泉寇宜飭兵馬
練戰士以須其至坐得致敵之術以逸擊勞取勝之道
也今恐二郡兵少不足以守而發之行政釋致虜之術
而從為虜所致之道臣愚以為不便先零羗虜欲為背
畔故與罕开解仇結約然其私心不能亡恐漢兵至而
罕开背之也臣愚以為其計常欲先赴罕开之急以堅
其約先擊罕羗先零必助之今虜馬肥糧食方饒擊之
恐不能傷害適使先零得施德於罕羗堅其約合其黨

虜交堅黨合精兵二萬餘人迫脅諸小種附者者稍衆
莫須之屬不輕得離也

莫須小種名

如是虜兵寢多誅之用

力數倍臣恐國家憂累繇十年數不二三歲而已臣得
蒙天子厚恩父子俱為顯列臣位至上卿爵為列侯犬
馬之齒七十六為明詔填溝壑死骨不朽亡所顧念獨
思惟兵利害至孰悉也於臣之計先誅先零已則罕开
之屬不煩兵而服矣先零已誅而罕开不服涉正月擊
之得利之理又其時也以今進兵誠不見其利唯陛下

裁察

後罕羗竟不煩兵而下

上屯田奏一

充國度先零羗必壞欲罷騎兵屯田以待其敝會得進兵璽書因上

奏

臣聞兵者所以明德除害也故舉得於外則福生於內不可不慎臣所將吏士馬牛食月用糧穀十九萬九千六百三十斛鹽千六百九十三斛芟橐二十五萬二百八十六石

芟乾芻也橐禾稈也石百二十斤

難久不解繇役不息又恐

它夷卒有不虞之變相因竝起為明主憂誠非素定廟

勝之冊

廟勝謂謀於廟堂而勝敵也

且羗虜易以計破難用兵碎也

故臣愚以為擊之不便計度臨羗東至浩亶羗虜故田

及公田民所未墾可二千頃以上其間郵亭多壞敗者

臣前部士入山伐材木大小六萬餘枚皆在水次願罷

騎兵畱弛刑應募及淮陽汝南步兵與吏士私從者合

凡萬二百八十一人用穀月二萬七千三百六十三斛

鹽三百八斛分屯要害處水解漕下繕鄉亭浚溝渠

漕下

以水運木而下也
繕補也浚深治也

治湟陜以西道橋七十所令可至鮮

水左右田事出賦人二十晦

事出謂至春人出營田也賦謂班與之也

至四

月草生發郡騎及屬國胡騎伉健各千倅馬什二就草

倅副也什二者千騎則與副

為田者遊兵以充入金城

馬二百匹也○伉口浪反

郡益積畜省大費今大司農所轉穀至者足支萬人一

歲食謹上田處及器用簿唯陛下裁許

屯田奏二

上報曰皇帝問後將軍言欲罷騎兵萬人畱田即如將軍之計虜當何時

伏誅兵當何時得決孰計其便復奏

臣聞帝王之兵以全取勝是以貴謀而賤戰戰而百勝

非善之善者也故先為不可勝以待敵之可勝蠻夷習

俗雖殊於禮義之國然其欲避害就利愛親戚畏死亡

一也今虜亡其美地薦草

薦稠草

愁於寄託遠遯骨肉離

心人有畔志而明主般師罷兵

般音班

萬人畱田順天時

因地利以待可勝之虜雖未即伏辜兵決可暮月而望

羗虜瓦解前後降者萬七百餘人及受言去者凡七十

輩

受言去者謂羗受充國之言歸相告喻者也

此坐支解羗虜之具也臣謹

條不出兵畱田便宜十二事步兵九校

一部為一校也

吏士萬

人畱屯以為武備因田致穀威德並行一也又因排折
羗虜令不得歸肥饒之墜貧破其衆以成羗虜相畔之
漸二也居民得並田作不失農業三也軍馬一月之食
度支田士一歲罷騎兵以省大費四也至春省甲士卒
循河湟漕穀至臨羗以眎羗虜眎亦示字揚威武傳世折衝
之具五也以閒暇時下所伐材繕治郵亭充入金城六
也兵出乘危徼幸不出令反畔之虜竄於風寒之地離
霜露疾疫瘡墮之患離遭也墮謂因寒瘡而墮指者也坐得必勝之道

七也亡經阻遠追死傷之害八也內不損威武之重外

不令虜得乘間之執九也

間謂軍之閒隙

又亡驚動河南大開

小開

皆羗種在河西之河南也

使生他變之憂十也治湟陜中道橋

令可至鮮水以制西域信威千里從枕席上過師十一

也

橋成軍行安易若於枕席上過也

大費既省繇役豫息以戒不虞十

二也畱屯田得十二便出兵失十二利臣充國材下犬

馬齒衰不識長冊唯明詔博詳公卿議臣採擇

屯田奏三

上復賜報曰皇帝問後將軍言十二便聞之虜雖未伏誅兵決可期月而

望期月而望者謂今冬邪謂何時也將軍獨
不計虜聞兵頗罷且丁壯相聚攻擾田者及
道上屯兵復殺略人民將何以止之又大升
小开前言曰我告漢軍先零所在兵不往擊
久畱得亡效五年時不分別人而并擊我其
意恐今兵不出得亡變生與先零為一將軍
孰計
復奏

臣聞兵以計為本故多算勝少算先零羗精兵今餘不
過七八千人失地遠客分散饑凍旱开莫須又頗暴略
其羸弱畜產畔還者不絕皆聞天子明令相捕斬之賞
臣愚以為虜破壞可日月冀遠在來春故曰兵決可期

月而望竊見北邊自敦煌至遼東萬一千五百餘里乘
塞列隧有吏卒數千人虜數大衆攻之而不能害今畱
步士萬人屯田地執平易多高山遠望之便部曲相保
為塹壘木樵

樵與譙同謂為高樓以望敵也○樵才消反

校聯不絕

校謂用木自相

貫穿以為固者

便兵弩飭鬪具逢火幸通執及并力以逸待勞

兵之利者也臣愚以為屯田內有亡費之利外有守禦
之備騎兵雖罷虜見萬人畱田為必禽之具其土崩歸
德宜不久矣從今盡三月虜馬羸瘦必不敢捐其妻子

於它種中遠涉河山而來為寇又見屯田之士精兵萬人終不敢復將其累重還歸故地

累重謂妻子也

是臣之愚計

所以度虜且必瓦解其處不戰而自破之冊也至於虜

小寇盜時殺人民其原未可卒禁臣聞戰不必勝不苟

接刃攻不必取不苟勞衆誠令兵出雖不能滅先零

能令虜絕不為小寇則出兵可也

亶但同

即今同是

俱不能止

小寇盜而釋坐勝之道從乘危之執往終不見利空內自

罷敝貶重而自損非所以視蠻夷也

視讀日示

又大兵一出

還不可復畱湟中亦未可空如是繇役復發也且匈奴不可不備烏桓不可不憂今又轉運煩費傾我不虞之用以澹一隅

澹古贍字給也

臣愚以為不便校尉臨衆幸得承

威德奉厚幣拊循衆羌諭以明詔宜皆鄉風雖其前辭嘗曰得亡效五年宜亡它心不足以故出兵臣竊自惟念奉詔出塞引軍遠擊窮天子之精兵散車甲於山野雖亡尺寸之功媮得避嫌之便

嫌同嫌讀與

而亡後咎餘責

此人臣不忠之利非明主社稷之福也臣幸得奮精兵

討不義久畱天誅

言不早殄滅賊也

罪當萬死陛下寬仁未忍

加誅令臣數得執計愚臣伏計孰甚不敢避斧鉞之誅

昧死陳愚唯陛下省察

詔罷兵獨充國畱屯田諸羗死亡降散所餘無幾明年請罷屯

田充國振旅而還

鄭昌

涿郡太守

請定律令疏

宣帝置廷平秩六百石以平刑選于定國為廷尉黃霸等為廷平昌

因上疏

聖王置諫爭之臣者非以崇德防逸豫之生也立法明

刑者非以為治救衰亂之起也今明主躬垂明聽雖不
置廷平獄將自正若開後嗣不若刪定律令律令一定
愚民知所避姦吏無所弄矣今不正其本而置廷平以
理其末也政衰聽怠則廷平將招權而為亂首矣

張敞

字子高本河東平陽人後徙杜陵治春秋
以經術自輔歷官守相京兆尹以能吏稱

上霍氏封事

宣帝漸疎霍氏山雲以過歸第諸
壻親屬頗出補吏敞聞之上封事

臣聞公子季友有功於魯大夫趙衰有功於晉大夫田
完有功於齊皆疇其官邑延及子孫終後田氏篡齊趙

氏分晉季氏顓魯故仲尼作春秋迹盛衰譏世卿最甚
廼者大將軍決大計安宗廟定天下功亦不細矣夫周
公七年耳而大將軍二十歲海內之命斷於掌握方其
隆時感動天地侵迫陰陽月朏日蝕晝冥宵光地大震
裂火生地中天文失度祇祥變怪不可勝記皆陰類盛
長臣下顓制之所生也朝臣宜有明言曰陛下褒寵故
大將軍以報功德足矣間者輔臣顓政貴戚太盛君臣
之分不明請罷霍氏三侯皆就第及衛將軍張安世宜

賜几杖歸休時存問召見以列侯為天子師明詔以恩
不聽羣臣以義固爭而後許天下必以陛下為不忘功
德而朝臣為知禮霍氏世世無所患苦今朝廷不聞直
聲

言朝臣不進直言以陳其事

而令明詔自親其文非策之得者也

今兩侯以出人情不相遠以臣心度之大司馬及其枝
屬必有畏懼之心夫近臣自危非完計也臣敬願於廣
朝白發其端直守遠郡其路無由夫心之精微口不能
言也言之微眇書不能文也故伊尹五就桀五就湯蕭

相國薦淮陰累歲乃得通況乎千里之外因書文諭事
指哉唯陛下省察

劾黃霸奏

竊見丞相請與中二千石博士雜問郡國上計長吏守
丞為民興利除害成大化條其對有耕者讓畔男女異
路道不拾遺及舉孝子弟弟貞婦者為一輩先上殿丞
所居屋也古者屋之高嚴舉而不知其人數者次之不
通呼為殿不必宮中也為條教者在後叩頭謝丞相雖口不言而心欲其為之

也長吏守丞對時臣敞舍有鵲雀飛止丞相府屋上丞相以下見者數百人邊吏多知鵲雀者問之皆陽不知

丞相圖議上奏曰臣問上計長吏守丞以興化條

凡言條者

一一而疏舉之若木條然

皇天報下神雀後知從臣敞舍來乃止郡

國吏竊笑丞相仁厚有知略微信奇怪也昔汲黯為淮陽守辭去之官謂大行李息曰御史大夫張湯懷詐阿意以傾朝廷公不早白與俱受戮矣息畏湯終不敢言後湯誅敗上聞黯與息語乃抵息罪而秩黯諸侯相取

其思竭忠也臣敞非敢毀丞相也誠恐羣臣莫白而長

吏守丞畏丞相指歸舍法令各為私教務相增加澆淳

散樸並行偽貌有名亡實傾搖解怠甚者為妖假令京

師先行讓畔異路道不拾遺其實亡益廉貪貞淫之行

而以偽先天下固未可也即諸侯先行之偽聲軼於京

師非細事也

軼過也

漢家承敝通變造起律令即以勸善

禁姦條貫詳備不可復加宜令貴臣明飭長吏守丞歸
告二千石舉三老孝弟力田孝廉廉吏務得其人郡事

皆以義法令檢式毋得擅為條教敢挾詐偽以奸名譽

者必先受戮

奸求也

以正明好惡

敬舍鵠雀飛集丞相府霸以為神雀議欲以聞

敬因奏霸天子嘉納敬言召上計吏使侍中臨飭如敬指意霸甚慚

自請治盜賊書

臣聞忠孝之道退家則盡心於親進宦則竭力於君夫小國中君猶有奮不顧身之臣況於明天子乎今陛下遊意於太平勞精於政事疊疊不舍晝夜羣臣有司宜各竭力致身山陽郡戶九萬三千口五十萬以上訖計

盜賊未得者七十七人它課諸事亦略如此臣敬愚駑
既無以佐思慮久處閒郡身逸樂而忘國事非忠孝之
節也伏聞膠東勃海左右郡歲數不登盜賊並起至攻
官寺篡囚徒搜市朝劫列侯吏失綱紀姦軌不禁臣敬
不敢愛身避死唯明詔之所處願盡力摧挫其暴虐存
撫其孤弱事即有業所至郡條奏其所由廢及所以興
之狀有業言各得其所時勃海膠東盜賊並起敬上書
自請治之書奏天子徵敬拜膠東相賜黃金三十
斤辭之官自謂治劇郡非賞罰無以勸善懲惡吏
追捕有功效者願得一切比三輔尤異天子許之

賈捐之

字君房賈誼之曾孫元帝初待詔金馬門
數召見言多納用時中書令石顯用事捐

之數短顯以故不
得官後坐法棄市

請棄珠厓對

事詳罷珠
厓詔註

臣幸得遭明盛之朝蒙危言之策無忌諱之患敢昧死

竭卷卷

表讀與
奉同

臣聞堯舜聖之盛也禹入聖域而不優

故孔子稱堯曰大哉韶曰盡善禹曰無間以三聖之德

地方不過數千里西被流沙東漸於海朔南暨聲教迄

於四海

此引禹
貢之辭

欲與聲教則治之不欲與者不彊治也

故君臣歌德含氣之物各得其宜武丁成王殷周之大

仁也然地東不過江黃西不過氐羗南不過蠻荆北不

過朔方是以頌聲竝作視聽之類咸樂其生越裳氏重

九譯而獻

遠國使來因九譯言語乃通也

此非兵革之所能致及其衰

也南征不還

謂昭王也

齊桓救其難

謂襄王也初為太子而惠王欲立王子帶齊桓

公為首止之盟以定太子之位事在左傳僖五年

孔子定其文

孔子作春秋

以至乎

秦興兵遠攻貪外虛內務欲廣地不慮其害然地南不

過閩越北不過太原而天下潰畔禍卒在於二世之末

長城之歌至今未絕賴聖漢初興為百姓請命平定天下至孝文皇帝閔中國未安偃武行文則斷獄數百民賦四十丁男三年而一事

常賦歲百二十歲一事時天下民多故出賦四十三歲而

一時有獻千里馬者詔曰鸞旗在前屬車在後

鸞旗編以羽毛

列繫撞旁載於車上大駕出則陳於道而先行屬車相連屬而陳於後也

吉行日五十里師

行三十里朕乘千里之馬獨先安之於是還馬與道里

費而下詔曰朕不受獻也其令四方毋求來獻當此之

時逸游之樂絕奇麗之賂塞鄭衛之倡微矣夫後宮盛

色則賢者隱處佞人用事則諍臣杜口而文帝不行故
諡為孝文廟稱太宗至孝武皇帝元狩六年太倉之粟
紅腐而不可食都內之錢貫朽而不可校廼探平城之
事追計其事故言探錄冒頓以來數為邊害籍兵厲馬因富民

以攘服之西連諸國至於安息東過碣石以玄菟樂浪
為郡北卻匈奴萬里更起營塞制南海以為八郡則天
下斷獄萬數民賦數百造鹽鐵酒榷之利以佐用度猶
不能足當此之時寇賊竝起軍旅數發父戰死於前子

鬪傷於後女子乘亭鄣孤兒號於道老母寡婦飲泣巷
哭遙設虛祭想魂乎萬里之外淮南王盜寫虎符陰聘
名士關東公孫勇等詐為使者是皆廓地泰大征伐不
休之故也今天下獨有關東關東大者獨有齊楚民衆
久困連年流離離其城郭相枕席於道路人情莫親父
母莫樂夫婦至嫁妻賣子法不能禁義不能止此社稷
之憂也今陛下不忍悁悁之忿欲驅士衆擠之大海之
中快心幽冥之地非所以救助饑饉保全元元也詩云

蠢爾蠻荆大邦為讎

小雅采芑之詩

言聖人起則後服中國衰

則先畔動為國家難自古而患之久矣何況迺復其南

方萬里之蠻乎駱越之人父子同川而浴相習以鼻飲

與禽獸無異本不足郡縣置也顓顓獨居一海之中

顓顓

猶區區也

霧露氣濕多毒草蟲蛇水土之害人未見虜戰士

自死又非獨珠厓有珠犀瑇瑁也

瑇瑁文甲也○瑇音代瑁音妹

棄之

不足惜不擊不損威其民譬猶魚鼈何足貪也臣竊以
往者羗軍言之暴師曾未一年兵出不踰千里費四十

餘萬萬大司農錢盡廼以少府禁錢續之

少府錢主供天子故曰禁

錢

夫一隅為不善費尚如此況於勞師遠攻亡士毋功乎求之往古則不合施之當今又不便臣愚以為非冠帶之國禹貢所及春秋所治皆可且無以為願遂棄珠厓專用恤關東為憂

匡衡

字稚圭東海承人好學善說詩元帝時數上疏陳便宜傳經義為丞相封樂安侯成帝初

免為

庶人

政治得失疏

時有地震日蝕之變元帝問政事得失衡為博士給事中上疏

臣聞五帝不同樂三王各異教民俗殊務所遇之時異也陛下躬聖德開太平之路閔愚吏民觸法抵禁比年大赦使百姓得改行自新天下幸甚臣竊見大赦之後姦邪不為衰止今日大赦明日犯法相隨入獄此殆導之未得其務也蓋保民者陳之以德義示之以好惡觀其失而制其宜故動之而和綏之而安今天下俗貪財賤義好聲色上侈靡上謂崇尚也廉耻之節薄淫辟之意縱綱紀失序疏者踰內親戚之恩薄婚姻之黨隆苟合徼

幸以身設利不改其原雖歲赦之刑猶難使錯而不用也臣愚以為宜壹曠然大變其俗孔子曰能以禮讓為國乎何有朝廷者天下之楨榦也公卿大夫相與循禮恭讓則民不爭好仁樂施則下不暴上義高節則民興行寬柔和惠則衆相愛四者明王之所以不嚴而成化也何者朝有變色之言則下有爭鬪之患上有自專之士則下有不讓之人上有克勝之佐則下有傷害之心上有好利之臣則下有盜竊之民此其本也今俗吏之

治皆不本禮讓而上克暴或忤害好陷人於罪貪財而慕執故犯法者衆姦邪不止雖嚴刑峻法猶不為變此非其天性有由然也臣竊考國風之詩周南召南被賢聖之化深故篤於行而廉於色鄭伯好勇而國人暴虎

詩鄭風太叔于田之篇曰禮褐暴虎獻于公所

秦穆貴信而士多從死

秦穆公與羣臣

飲酒酒酣公曰生共此樂死共此哀於是奄息仲行鍼虎許諾及公薨皆從死黃鳥詩所為作也

陳夫

人好巫而民淫祀

胡公夫人武王之女大姬無子好祭鬼神鼓舞而祀故其詩云坎其擊鼓

宛丘之下無冬無夏值其鷺羽

晉侯好儉而民畜聚

唐風山有樞之詩序云刺晉昭公也

其詩曰子有衣裳弗曳弗婁子有車馬弗馳弗驅其俗皆吝嗇而積財也

太王躬仁邠國貴

恕由此觀之治天下者審所上而已今之偽薄悻害不讓極矣臣聞教化之流非家至而人說之也賢者在位能者布職朝廷崇禮百僚敬讓道德之行由內及外自近者始然後民知所法遷善日進而不自知是以百姓安陰陽和神靈應而嘉祥見詩曰商邑翼翼四方之極壽考且寧以保我後生

商頌殷武之詩

此成湯所以建至治保

子孫化異俗而懷鬼方也今長安天子之都親承聖化

然其習俗無以異於遠方郡國來者無所法則或見侈

靡而放效之此教化之原本風俗之樞機宜先正者也

臣聞天人之際精祲有以相盪善惡有以相推事作乎

下者象動乎上陰陽之理各應其感陰變則靜者動陽

蔽則明者晦水旱之災隨類而至今關東連年饑饉百

姓乏困或至相食此皆生於賦斂多民所共者大

共讀曰供

而吏安集之不稱之效也陛下祇畏天戒哀閔元元大

自減損省甘泉建章宮衛罷珠厓偃武行文將欲度唐

虞之隆絕殷周之衰也諸見罷珠厓詔書者莫不欣欣
人自以將見太平也宜遂減宮室之度省靡麗之飾考
制度修外內近忠正遠巧佞放鄭衛進雅頌舉異材開
直言任溫良之人退刻薄之吏顯絜白之士昭無欲之
路覽六藝之意察上世之務明自然之道博和睦之化
以崇至仁匡失俗易民視令海內昭然咸見本朝之所
貴道德弘於京師淑問揚乎疆外然後大化可成禮讓
可興也

治性正家疏

時傅昭儀及子定陶王愛幸寵於皇后太子衡復上疏

臣聞治亂安危之機在乎審所用心蓋受命之王務在創業垂統傳之無窮繼體之君心存於承宣先王之德而褒大其功昔者成王之嗣位思述文武之道以養其心休烈盛美皆歸之二后而不敢專其名是以上天歆享鬼神祐焉其詩曰念我皇祖陟降廷止周頌閔予小子之詩言成王常思祖考之業而鬼神祐助其治也陛下聖德天覆子愛海內然陰陽未和姦邪未禁者殆論議者未不

揚先帝之盛功爭言制度不可用也務變更之所更或

不可行而復復之是以羣下更相是非吏民無所信臣

竊恨國家釋樂成之業而虛為此紛紛也願陛下詳覽

統業之事畱神於遵制揚功以定羣下之心大雅曰無

念爾祖聿修厥德

大雅文王之詩

孔子著之孝經首章蓋至德

之本也傳曰審好惡理情性而王道畢矣能盡其性然

後能盡人物之性能盡人物之性可以贊天地之化治

性之道必審已之所有餘而強其所不足蓋聰明疏通

者戒於大察寡聞少見者戒於雍蔽勇猛剛强者戒於
大暴仁愛溫良者戒於無斷湛靜安舒者戒於後時廣
心浩大者戒於遺忘必審已之所當戒而齊之以義然
後中和之化應而巧偽之徒不敢比周而望進唯陛下
戒所以崇聖德臣又聞室家之道修則天下之理得故
詩始國風禮本冠婚始乎國風原情性而明人倫也本
乎冠婚正基兆而防未然也福之興莫不本乎室家道
之衰莫不始乎梱內

梱與閭同
謂門槪也

故聖王必慎妃后之祭

別適長之位禮之於內也卑不踰尊新不先故所以統
人情而理陰氣也其尊適而卑庶也適子冠乎阼禮之
用醴衆子不得與列所以貴正體而明嫌疑也非虛加
其禮文而已乃中心與之殊異故禮探其情而見之外
也聖人動靜游燕所親物得其序得其序則海內自修
百姓從化如當親者疏當尊者卑則佞巧之姦因時而
動以亂國家故聖人慎防其端禁於未然不以私恩害
公義陛下聖德純備莫不修正則天下無為而治詩云

于以四方克定厥家

周頌桓之詩

傳曰正家而天下定矣

易家

人卦之彖辭

戒妃匹勸經學疏

成帝初即位衡上疏戒妃匹勸經學威儀之則上敬納其

言

陛下秉至孝哀傷思慕不絕於心未有游虞弋射之宴

誠隆於慎終追遠無窮已也竊願陛下雖聖性得之猶

復加聖心焉詩云煢煢在疚

周頌閔予小子之詩

言成王喪畢思

慕意氣未能平也蓋所以就文武之業崇大化之本也

臣又聞之師曰匹配之際生民之始萬福之原婚姻之禮正然後品物遂而天命全孔子論詩以關雎為始言太上者民之父母后夫人之行不侔乎天地則無以奉神靈之統而理萬物之宜故詩曰窈窕淑女君子好逑周南關雎之詩言能致其貞淑不貳其操情欲之感無介乎容儀宴私之意不形乎動靜夫然後可以配至尊而為宗廟主此綱紀之首王教之端也自上世已來三代興廢未有不由此者也願陛下詳覽得失盛衰之效以定大

基采有德戒聲色近嚴敬遠技能竊見聖德純茂專精
詩書好樂無厭臣衡材駑無以輔相善義宣揚德音臣
聞六經者聖人所以統天地之心著善惡之歸明吉凶
之分通人道之正使不悖於其本性者也故審六藝之
指則天人之理可得而和草木昆蟲可得而育此永永
不易之道也及論語孝經聖人言行之要宜究其意臣
又聞聖王之自為動靜周旋奉天承親臨朝享臣物有
節文以章人倫蓋欽翼祇栗事天之容也溫恭敬遜承

親之禮也正躬嚴恪臨衆之儀也嘉惠和說饗下之顏也舉錯動作物遵其儀故形為仁義動為法則孔子曰德義可尊容止可觀進退可度以臨其民是以其民畏而愛之則而象之大雅云敬慎威儀惟民之則諸侯正月朝覲天子天子惟道德昭穆穆以視之又觀以禮樂饗醴乃歸故萬國莫不獲賜祉福蒙化而成俗今正月初幸路寢臨朝賀置酒以饗萬方傳曰君子慎始願陛下畱神動靜之節使羣下得望盛德休光以立基楨

貢禹

字少翁琅邪人以明經絜行著聞元帝初即位徵為諫議大夫數虛已問以政事書數十

上歷官御

史大夫

循古節儉奏

時年歲不登郡國多困

古者宮室有制宮女不過九人秣馬不過八匹墻塗而不凋木摩而不刻車輿器物皆不文畫苑囿不過數十里與民共之任賢使能什一而稅亡它賦斂繇戍之役使民歲不過三日千里之內自給千里之外各置貢職而已故天下家給人足頌聲竝作至高祖孝文孝景皇

帝循古節儉宮人不過十餘廐馬百餘匹孝文皇帝衣
綈履革器亡琬文金銀之飾後世爭為奢侈轉轉益甚
臣下亦相放效衣服履絳刀劒亂於主上絳古
袴字主上時
臨朝入廟衆人不能別異甚非其宜然非自知奢僭也
猶魯昭公曰吾何僭矣今大夫僭諸侯諸侯僭天子天
子過天道其日久矣承衰救亂矯復古化在於陛下臣
愚以為盡如太古難宜少放古以自節焉論語曰君子
樂節禮樂方今宮室已定亡可奈何矣其餘盡可減損

故時齊三服官輸物不過十筭

三服官主作天子之服在齊地筭盛衣竹器○

筭先嗣反

方今齊三服官作工各數千人一歲費數鉅萬蜀

廣漢主金銀器歲各用五百萬三工官官費五千萬

三工

官謂少府屬官考工室也右工室也東園匠也

東西織室亦然廐馬食粟將萬

匹臣禹嘗從之東宮

東宮太后宮

見賜杯案盡文畫金銀飾

非當所以賜食臣下也東宮之費亦不可勝計天下之

民所為大飢餓死者是也今民大飢而死又不葬為

犬豬所食人至相食而廐馬食粟苦其大肥氣盛怒至

乃日步作之

日日行步而動作之以散充溢之氣

王者受命於天為民父

母固當若此乎天不見邪武帝時又多取好女至數千人以填後宮及棄天下昭帝幼弱霍光專事不知禮正妄多藏金錢財物鳥獸魚鼈牛馬虎豹生禽凡百九十物盡瘞臧之又皆以後宮女置於園陵大失禮逆天心又未必稱武帝意也昭帝晏駕光復行之至孝宣皇帝時陛下惡有所言羣臣亦隨故事甚可痛也故使天下承化取女皆大過度諸侯妻妾或至數百人豪富吏民

畜歌者至數十人是以內多怨女外多曠夫及衆庶葬埋皆虛地上以實地下其過自上生皆在大臣循故事之臯也唯陛下深察古道從其儉者大減損乘輿服御器物三分去二子產多少有命審察後宮擇其賢者畱二十人餘悉歸之及諸陵園女亡子者宜悉遣獨杜陵宮人數百誠可哀憐也廐馬可亡過數十匹獨舍長安城南苑地以為田獵之囿自城西南至山西至鄠皆復其田以與貧民方今天下飢饉可亡大自損減以救之

稱天意乎天生聖人蓋為萬民非獨使自娛樂而已也

故詩曰天難諶斯不易惟王上帝臨女毋貳爾心

大雅大明

之當仁不讓獨可以聖心參諸天地揆之往古不可與

臣下議也若其阿意順指隨君上下臣禹不勝拳拳不

敢不盡愚心

天子納善其忠下詔太僕減食穀馬水衡減食肉獸省宜春下苑以與貧民罷角抵

諸戲及齊

三服官

言錢幣書

古者不以金錢為幣專意於農故一夫不耕必有受其

飢者今漢家鑄錢及諸鐵官皆置吏卒徒攻山取銅鐵
一歲功十萬人已上中農食七人是七十萬人常受其
飢也鑿地數百丈銷陰氣之精地臧空虛不能含氣出
雲斬伐林木亡有時禁水旱之災未必不繇此也自五
銖錢起已來七十餘年民坐盜鑄錢被刑者衆富人積
錢滿室猶亡厭足民心動搖商賈求利東西南北各用
智巧好衣美食歲有十二之利而不出租稅農夫父子
暴露中野不避寒暑梓少把土手足胼胝

梓拔取也把
手拊之也胼

併也。胝，繭也。○梓才元反。把，蒲巴反。耕步千反。胝，竹尸反。

已奉穀租，又出橐稅。

橐，禾稈也。

鄉部私求不可勝供，故民棄本逐末，耕者不能半，貧民

雖賜之田，猶賤賣以賈。

賣田與人而更爲商賈之業。

窮則起爲盜賊。

何者？末利深而惑於錢也。是以姦邪不可禁，其原皆起

於錢也。疾其末者，絕其本，宜罷採珠玉、金銀、鑄錢之官。

亡復以爲幣，市井勿得販賣，除其租銖之律。

租稅之法皆依田畝。

不得雜計百物之銖兩。

租稅祿賜皆以布帛及穀，使百姓壹歸於

農，復古道便。

言風俗書

孝文皇帝時貴廉絜賤貪污賈人贅婿及吏坐臧者皆
禁錮不得為吏賞善罰惡不阿親戚罪白者伏其誅疑
者以與民

罪疑從輕也

亡贖罪之法故令行禁止海內大化

天下斷獄四百與刑錯亡異武帝始臨天下尊賢用士
闢地廣境數千里自見功大威行遂從者欲

從讀日縱

用度

不足乃行壹切之變使犯法者贖罪入穀者補吏是以
天下奢侈官亂民貧盜賊竝起亡命者衆郡國恐伏其

誅則擇便巧史書習於計簿能欺上府者以為右職

上府

謂所屬之府
右職高職也

姦軌不勝則取勇猛能操切百姓者以苛

暴威服下者使居大位故亡義而有財者顯於世欺謾
而善書者尊於朝諄逆而勇猛者貴於官故俗皆曰何
以孝弟為財多而光榮何以禮義為史書而仕宦何以
謹慎為勇猛而臨官故黥劓而髡鉗者猶復攘臂為政
於世行雖犬彘家富執足目指氣使是為賢耳故謂居
官而置富者為雄桀處姦而得利者為壯士兄勸其弟

父勉其子俗之壞敗乃至於是察其所以然者皆以犯
法得贖罪求士不得真賢相守崇財利誅不行之所致
也今欲興至治致太平宜除贖罪之法相守選舉不以
實及有臧者輒行其誅亡但免官則爭盡力為善貴孝
弟賤賈人進真賢舉實廉而天下治矣孔子匹夫之人
耳以樂道正身不解之故

解讀
曰解

四海之內天下之君微

孔子之言亡所折中況乎以漢地之廣陛下之德處南
面之尊秉萬乘之權因天地之助其於變世易俗調和

陰陽陶冶萬物化正天下易於決流抑隊

決欲流之水
抑將隊之物

言其便易○
隊與墜同

自成康以來幾且千歲欲為治者甚衆然

而太平不復興者何也以其舍法度而任私意奢侈行
而仁義廢也陛下誠深念高祖之苦醇法太宗之治正
己以先下選賢以自輔開進忠正致誅姦臣遠放譴佞
放出園陵之女罷倡樂絕鄭聲去甲乙之帳退偽薄之
物修節儉之化驅天下之民皆歸於農如此不解則三
王可侔五帝可及唯陛下留意省察天下幸甚

蕭望之

字長倩東海蘭陵人徙杜陵宣帝時為太子太傅受遺詔以前將軍輔政元帝初為

弘恭石顯所譖免尋賜爵關內侯給事中復下獄自裁

入穀贖罪議

時京兆尹張敞上書令諸有辜非盜受財殺人及犯法不得赦者皆

得以差入穀隴西以北安定以西八郡贖罪望之與少府李彊同上議

民函陰陽之氣有仁義欲利之心在教化之所助堯在上不能去民欲利之心而能令其欲利不勝其好義也雖桀在上不能去民好義之心而能令其好義不勝其欲利也故堯桀之分在於義利而已道民不可不慎也

今欲令民量粟以贖罪如此則富者得生貧者獨死是
貧富異刑而法不壹也人情貧窮父兄囚執聞出財得
以生活為人子弟者將不顧死亡之患敗亂之行以赴
財利求救親戚一人得生十人以喪如此伯夷之行壞
公綽之名滅

公綽魯大夫孟公綽

政教壹傾雖有周召之佐恐不

能復古者藏於民不足則取有餘則予詩曰爰及矜人
哀此鰥寡上惠下也又曰雨我公田遂及我私下急上
也今有西邊之役民失作業雖戶賦口斂以贍其困乏

率戶而賦計古之通義百姓莫以為非以死救生恐未口而斂也

可也子弟竭死以救父兄令其生也陛下布德施教教化既成堯舜亡

以加也今議開利路以傷既成之化臣竊痛之宣帝下其議難

問張敞敞持之堅望之彊復對曰天漢四年常使死罪人入五十萬錢減死罪一等豪彊吏民請奪假貨至為盜賊以贖罪其後羣盜並起至攻城邑殺郡守充滿山谷吏不能禁明詔遣繡衣使者興兵擊之誅者過半然後衰止愚以為此使死罪贖之敗也故曰不便上遂不施敞議

王褒字子淵蜀人也以益州刺史薦令待詔擢為諫大夫

聖主得賢臣褒為益州刺史王褒作中和樂職宣布詩褒因奏言褒有軼才

宣帝乃徵集既
至詔為此頌

夫荷旗被毳者難與道純縣之麗密羹藜啗糗者不足

與論太牢之滋味

藜野菜也糗麥飯也太牢牛也

今臣僻在西蜀生於

窮巷之中長於蓬茨之下無有游觀廣覽之知顧有至

愚極陋之累不足以塞厚望應明旨雖然敢不略陳愚

心而抒情愫記曰恭惟春秋法五始之要在乎審已正

統而已

元者氣之始春者四時之始王者受命之始正月者政教之始公即位者一國之始

夫賢

者國家之器用也所任賢則趨舍省而功施普器用利

則用力少而就效衆故工人之用鈍器也勞筋苦骨終

日矻矻及至巧冶鑄干將之璞清水淬其鋒越砥斂其

鍔璞劍未理者越砥磨石名也

水斷蛟龍陸剝犀革忽若篲汜畫塗

汜洒地也斬蛟斷犀若以帚掃地以刀畫泥言器之利也如此則使離婁督繩公輸

削墨雖崇臺五層延袤百丈而不溷者工用相得也庸

人之御駕馬亦傷吻弊策而不進於行胸喘膚汗人極

馬倦及至駕齧膝驂乘旦

齧膝乘旦皆良馬名

王良執靶韓哀附

輿縱騁馳騫忽如景靡過都越國蹶如歷塊

蹶疾也

追奔

電逐遺風周流八極萬里一息何其遼哉人馬相得也

故服絺綌之涼者不苦盛暑之鬱燠襲狐貉之煖者不

憂至寒之悽愴何則有其具者易其備賢人君子亦聖

王之所以易海內也是以嘔喻受之嘔喻喜悅貌開寬裕之

路以延天下之英俊也夫竭智附賢者必建仁策索人

求士者必樹伯迹昔周公躬吐握之勞故有圖空之隆

齊桓設庭燎之禮故有匡合之功圖空所謂建仁策也匡合所謂樹伯迹也

齊桓公設庭燎以待士之欲造見者由此觀之君人者勤於求賢而逸於

得人人臣亦然昔賢者之未遭遇也圖事揆策則君不用其謀陳見愆誠則上不然其信進仕不得施效斥逐又非其愆是故伊尹勤於鼎俎太公困於鼓刀百里自鬻甯子飯牛離此患也

離遭也

及其遇明君遭聖主也運

籌合上意諫諍則見聽進退得關其忠任職得行其術

去卑辱與漂而升本朝離疏釋蹻而享膏粱

閑猶用也與幽也漂

押也蹻以繩為屨也

剖符錫壤而光祖考傳之子孫以資說士故

世必有聖智之君而後有賢明之臣虎嘯而冽風龍興

而致雲螭蟠俟秋吟蜉蝣出以陰易曰龍龍在天利見
大人詩曰思皇多士生此王國故世平主聖俊又將自
至若堯舜禹湯文武之君獲稷契皋陶伊尹呂望之臣
明明在朝穆穆布列聚精會神相得益章雖伯牙操遞
鐘逢門子彎烏號猶未足以喻其意也

遞鐘琴名也烏號黃帝弓名

故聖主必待賢臣而弘功業俊士亦俟明主以顯其德
上下俱欲懽然交欣千載一會論說無疑異乎如鴻毛
遇順風沛乎如巨魚縱大壑其得意若此則胡禁不止

曷令不行化溢四表橫被無窮遐夷貢獻萬祥畢臻是以聖主不徧窺望而視已明不殫傾耳而聽已聰恩從祥風翺德與和氣游太平之責塞優游之望得導游自然之勢恬淡無為之場遵法也言法自然之道也休徵自至壽考無疆雍容垂拱永永萬年何必偃仰詘信若彭祖嘔噓呼吸如喬松眇然絕俗離世哉時帝好神仙故廣詩及之詩曰濟濟多士文王以寧蓋信乎其以寧也

諸葛豐

字少季琅邪人元帝時為司隸校尉

謝上書

時侍中許章以外屬貴幸賓客犯事與章相連豐案劾章欲奏其事適逢許侍

中私出豐駐車舉節詔章曰下欲收之章迫窘馳車去許侍中自歸上豐亦上奏於是收

豐節司隸去

節自豐始

臣豐駑怯文不足以勸善武不足以執邪陛下不量臣能否拜為司隸校尉未有以自效復秩臣為光祿大夫官尊責重非臣所當處也又迫年歲衰暮常恐卒填溝渠無以報厚德使論議士譏臣無補長獲素餐之名故常願捐一旦之命不待時而斷姦臣之首縣於都市編

書其罪使四方明知為惡之罰然後却就斧鉞之誅誠臣所甘心也夫以布衣之士尚猶有刎頸之交今以四海之大曾無仗節死誼之臣率盡苟合取容阿黨相為念私門之利忘國家之政邪穢濁溷之氣上感於天是以災變數見百姓困乏此臣下不忠之效也臣誠耻之亡已凡人情莫不欲安存而惡危亡然忠臣直士不避患害者誠為君也今陛下天覆地載物無不容使尚書令堯賜臣豐書曰夫司隸者刺舉不法善善惡惡非得

顓之也勉處中和順經術意恩深德厚臣豐頓首幸甚
臣竊不勝憤懣願賜清宴唯陛下裁幸

御選古文淵鑒卷十四



總校官庶吉士臣張能照

校對官助教臣汪錫魁

謄錄監生臣沈浩

欽定四庫全書薈要

集部

御選古文淵鑒卷十五

御選古文淵鑒卷十五目錄

漢



條災異封事

請封甘延壽陳湯疏

請起昌陵疏

極諫外家封事

定禮樂疏

杜欽

訟馮奉世疏

翼奉

應直言封事

薛宣

申勅刺史疏

王尊

勅掾功曹教

劾匡衡張譚奏

公乘興

訟王尊書

劉輔

諫立趙婕妤疏

谷永

祭祀方術奏

訟陳湯疏

梅福

言王氏書

請封孔子世為殷後書

御選古文淵鑒卷十五目錄

御選古文淵鑒卷十五

內閣學士兼禮部侍郎教習庶吉士臣徐乾學等奉

旨編注

漢

劉向

字子政本名更生楚元王交之曾孫元帝初為散騎宗正給事中與蕭望之周堪金敞同

輔政為外戚許史中書宦官弘恭石顯所譖下獄免官成帝即位復進用數奏封事為中壘校

尉

條災異封事

臣前幸得以骨肉備九卿奉法不謹乃復蒙恩竊見災

異並起天地失常徵表為國

徵證也

欲終不言念忠臣雖

在眵畝猶不忘君惓惓之義也況重以骨肉之親又加

以舊恩未報乎欲竭愚誠又恐越職然惟二恩未報忠

臣之義一抒愚意退就農畝死無所恨臣聞舜命九官

濟濟相讓和之至也衆賢和於朝則萬物和於野故蕭

韶九成而鳳皇來儀擊石拊石百獸率舞四海之內靡

不和寧及至周文開基西郊雜還衆賢罔不肅和

雜還衆賢罔不肅和

之貌○還大合反

崇推讓之風以銷分爭之訟文王既沒周公

思慕歌詠文王之德其詩曰於穆清廟肅雍顯相濟濟

多士秉文之德

周頌祀文王清廟之詩

當此之時武王周公繼政

朝臣和於內萬國驩於外故盡得其驩心以事其先祖

其詩曰有來雍雍至止肅肅相維辟公天子穆穆

周頌禘太

祖之言四方皆以和來也諸侯和於下天應報於上故

周頌曰降福穰穰

此執競之篇祀武王之詩

又曰飴我釐麴

此思文之篇以

后稷配天之詩

釐舜麥也始自天降此皆以和致和獲天助也

下至幽厲之際朝廷不和轉相非怨詩人疾而憂之曰

民之無良相怨一方

此小雅角弓之篇刺幽王之詩

衆小在位而從邪

議歛歛相是而背君子故其詩曰歛歛訛訛亦孔之哀

謀之其臧則具是違謀之不臧則具是依

此小雅小旻之篇刺幽王

之詩君子獨處守正不撓衆枉勉彊以從王事則反見憎

毒讒類故其詩曰密勿從事不敢告勞無罪無辜讒口

瞽瞍

此小雅十月之交篇刺幽王之詩密勿猶黽勉也詩作龜勉

當是之時日月薄

蝕而無光其詩曰朔日辛卯日有蝕之亦孔之醜

自此時下

至百川沸騰皆十月之交詩

又曰彼月而微此日而微今此下民亦

孔之哀又曰日月鞠凶不用其行四國無政不用其良

天變見於上地變動於下水泉沸騰山谷易處其詩曰

百川沸騰山冢卒崩高岸為谷深谷為陵哀今之人胡

憯莫懲霜降失節不以其時其詩曰正月繁霜我心憂

傷民之訛言亦孔之將言民以是為非甚衆大也

此小雅正

月之篇刺幽王之詩

此皆不和賢不肖易位之所致也自此之後

天下大亂篡殺殃禍並作厲王奔彘幽王見殺至乎平
王末年魯隱之始即位也周大夫祭伯乖離不和出奔
於魯而春秋為諱不言來奔傷其禍殃自此始也是後
尹氏世卿而專恣諸侯背畔而不朝周室卑微二百四
十二年之間

謂從隱公元年至哀公十四年獲麟也

日食三十六地震五

山陵崩阨二

阨下頽也
○文爾反

彗星三見夜常星不見夜中星

隕如雨一火災十四長狄入三國五石隕墜六鷁退飛
多麋有蜮蜚鸚鵡來巢者皆一見晝冥晦雨木冰李梅

冬實七月霜降草木不死八月殺菽大雨雹雨雪雷霆

失序相乘水旱饑螽蝻螟螽午並起

螽午猶禱沓也

當是時禍

亂輒應弑君三十六亡國五十二諸侯奔走不得保其

社稷者不可勝數也周室多禍晉敗其師於貿戎

貿戎地名

也春秋公羊經成元年秋王師敗績於貿戎傳曰孰敗之蓋晉敗之也○貿莫侯反

伐其郊鄭傷

桓王戎執其使

隱七年冬經書天王使凡伯來聘戎伐凡伯於楚丘以歸

衛侯朔召

不往齊逆命而助朔五大夫爭權三君更立莫能正理

周景王崩單穆公劉文公鞏簡公甘平公召莊公此五大夫相與爭奪更立王子猛子朝及敬王是為三君也

遂至陵夷不能復興由此觀之和氣致祥乖氣致異祥
多者其國安異衆者其國危天地之常經古今之通義
也今陛下開三代之業招文學之士優游寬容使得並
進今賢不肖渾駁白黑不分邪正雜糅忠讒並進

糅和也○

汝救反

章交公車人滿北軍

漢儀注中壘校尉主北軍壘門內尉一人主上書者獄上

章於公車有不如法者朝臣舛午

午五故反膠戾乖刺更相

譖譖轉相是非傳授增加文書紛糾前後錯繆毀譽渾
亂所以營惑耳目感移心意不可勝載分曹為黨往往

羣朋將同心以陷正臣正臣進者治之表也正臣陷者
亂之機也乘治亂之機未知孰任而災異數見此臣所
以寒心者也夫乘權藉勢之人子弟鱗集於朝羽翼陰
附者衆輻輳於前毀譽將必用以終乖離之咎是以日
月無光雪霜夏隕海水沸出陵谷易處列星失行皆怨
氣之所致也夫遵衰周之軌迹循詩人之所刺而欲以
成太平致雅頌猶卻行而求及前人也初元以來六年
矣案春秋六年之中災異未有稠如今者也夫有春秋

之異無孔子之救猶不能解紛況甚於春秋乎原其所
以然者讒邪並進也讒邪之所以並進者由上多疑心
既已用賢人而行善政如或譖之則賢人退而善政還
還謂收還也夫執狐疑之心者來讒賊之口持不斷之意者

開羣枉之門讒邪進則衆賢退羣枉盛則正士消故易
有否泰小人道長君子道消君子道消則政日亂故為
否否者閉而亂也君子道長小人道消小人道消則政
日治故為泰泰者通而治也詩又云雨雪瀼瀼見睍聿

消

此小雅角弓篇刺幽王好讒佞之詩

與易同義昔者鯀共工驩兜與舜

禹雜處堯朝周公與管蔡並居周位當是時迭進相毀

流言相謗豈可勝道哉帝堯成王能賢舜禹周公而消

共工管蔡故以大治榮華至今孔子與季孟偕仕於魯

李斯與叔孫俱官於秦定公始皇賢季孟李斯而消孔

子叔孫故以大亂污辱至今故治亂榮辱之端在所信

任信任既賢在於堅固而不移詩云我心匪石不可轉

也

邶風柏舟之詩言守善篤也易曰渙汗其大號

此易渙卦九五爻辭

言

號令如汗汗出而不反者也今出善令未能踰時而反是反汗也用賢未能三旬而退是轉石也論語曰見不善如探湯今二府奏佞調不當在位歷年而不去

二府丞相

御史也

故出令則如反汗用賢則如轉石去佞則如拔山

如此望陰陽之調不亦難乎是以羣小窺見閒隙緣飾

文字巧言醜詆流言飛文譁於民間故詩云憂心悄悄

愠於羣小

此卽栢舟言仁而不遇之詩

小人成羣誠足愠也昔孔子

與顏淵子貢更相稱譽不為朋黨禹稷與臯陶傳相汲

引不為比周何則忠於為國無邪心也故賢人在上位

則引其類而聚之於朝易曰飛龍在天大人聚也

此乾卦九

五象辭

在下位則思與其類俱進易曰拔茅茹以其彙征

吉

此泰卦初九爻辭

在上則引其類在下則推其類故湯用伊

尹不仁者遠而衆賢至類相致也今佞邪與賢臣並交

戟之內

交戟謂宿衛者

合黨共謀違善依惡歛歛訛訛數設危

險之言欲以傾移主上如忽然用之此天地之所以先
戒災異之所以重至者也自古明聖未有無誅而治者

也故舜有四放之罰而孔子有兩觀之誅然後聖化可得而行也今以陛下明知誠深思天地之心迹察兩觀之誅覽否泰之卦觀雨雪之詩歷周唐之所進以為法原秦魯之所消以為戒考祥應之福省災異之禍以揆當世之變放遠佞邪之黨壞散險詖之聚杜閉羣枉之門廣開衆正之路決斷狐疑分別猶豫使是非炳然可知則百異消滅而衆祥並至太平之基萬世之利也臣幸得託肺附

肺附謂肝肺相附著猶言心膂也

誠見陰陽不調不敢不

通所聞竊推春秋災異以效今事一二條其所以不宜

宣施臣謹重封昧死上

時蕭望之自殺天下甚悼恨之周堪與弟子張猛俱進用大見

信任恭顯數譖毀焉向懼其傾危乃上封事諫恭顯見其書愈與許史比而怨向等

請封甘延壽陳湯疏

延壽湯出西域發兵誅邳支單于石顯匡衡以為矯

制不宜加爵土議久不決向上疏

邳支單于囚殺使者吏士以百數事暴揚外國傷威毀重羣臣皆閔焉陛下赫然欲誅之意未嘗有忘西域都護延壽副校尉湯承聖指倚神靈總百蠻之君檻城郭

之兵

檻總持之也

出百死入絕域遂蹈康居屠五重城蹇歛

侯之旗

○音騫
擧拔也

斬郅支之首縣旌萬里之外揚威昆山

之西掃谷吉之恥

元帝初元中衛司馬谷吉送郅支侍子至其庭被殺

立昭明之

功萬夷懾伏莫不懼震呼韓邪單于見郅支已誅且喜

且懼鄉風馳義稽首來賓願守北藩累世稱臣立千載

之功建萬世之安羣臣之勲莫大焉昔周大夫方叔吉

甫為宣王誅獫狁而百蠻從其詩曰嘽嘽焞焞如霆如

雷顯允方叔征伐獫狁蠻荆來威

小雅采芑之詩

易曰有嘉折

首獲匪其醜

離上九
文辭

言美誅首惡之人而諸不順者皆

來從也今延壽湯所誅震雖易之折首詩之雷霆不能
及也論大功者不錄小過舉大美者不疵細瑕司馬法
曰軍賞不踰月欲民速得為善之利也蓋急武功重用
人也吉甫之歸周厚賜之其詩曰吉甫燕喜既多受祉
來歸自鎬我行永久小雅六
月之篇千里之鎬猶以為遠况萬
里之外其勤至矣延壽湯既未獲受祉之報反屈捐命
之功久挫於刀筆之前非所以勸有功厲戎士也昔齊

桓公前有尊周之功

謂伐楚責苞茅及會王太子於首止

後有滅項之罪

項國名春秋僖十七年夏滅項公羊傳曰齊滅之也不言齊為桓公諱也桓常有繼絕存亡之功故君子為之

諱

君子以功覆過而為之諱行事貳師將軍李廣利捐

五萬之師靡億萬之費經四年之勞

靡音康

而虜獲駿馬

三十匹雖斬宛王母鼓之首

西域傳作母寡而此云母鼓鼓寡聲相近

猶不

足以復費其私罪惡甚多孝武以為萬里征伐不錄其

過遂封拜兩侯三卿二千石百有餘人今康居國彊於

大宛邾支之號重於宛王殺使者罪甚於畱馬而延壽

湯不煩漢士不費斗糧比於貳師功德百之且常惠隨

欲擊之烏孫

宣帝初常惠以校尉護烏孫兵擊匈奴封長羅侯

鄭吉迎自來之

日逐

鄭吉迎日逐王詣京師封安遠侯

猶皆裂土受爵故言威武勤勞

則大於方叔吉甫列功覆過則優於齊桓貳師近事之

功則高於安遠長羅而大功未著小惡數布臣竊痛之

宜以時解縣通籍

縣罪未竟也通籍不禁止令得出入也

除過勿治尊寵

爵位以勸有功

於是天子下詔公卿議封焉

諫起昌陵疏

成帝營起昌陵數年不成復還歸延陵制度泰奢向上疏諫

臣聞易曰安不忘危存不忘亡是以身安而國家可保

也

下繫辭

故賢聖之君博觀終始窮極事情而是非分明

王者必通三統

天地人之始也

明天命所授者博非獨一姓也

孔子論詩至於殷士膚敏裸將于京

大雅文王之篇

喟然歎曰

大哉天命善不可不傳於子孫是以富貴無常不如是

則王公其何以戒慎民萌何以勸勉

萌與吐同無知之貌

蓋傷微

子之事周而痛殷之亡也雖有堯舜之聖不能化朱均

之子雖有禹湯之德不能訓末孫之桀紂自古及今未

有不亡之國也昔高皇帝既滅秦將都雒陽感寤劉敬之言自以德不及周而賢於秦遂徙都關中依周之德因秦之阻世之長短以德為効故常戰栗不敢諱亡孔子所謂富貴無常蓋謂此也孝文皇帝居霸陵北臨廁廁側近水也意悽愴悲懷顧謂羣臣曰嗟乎以北山石為椁

用紵絮斮陳漆其間

斮斬也陳施也斮絮以漆著其間也○紵張呂反斮側畧反

豈

可動哉張釋之進曰使其中有可欲雖銅南山猶有隙使其中無可欲雖無石椁又何感焉夫死者無終極而

國家有廢興故釋之之言為無窮計也孝文寤焉遂薄
葬不起山墳易曰古之葬者厚衣之以薪臧之中野不
封不樹後世聖人易之以棺槨棺槨之作自黃帝始黃
帝葬於橋山堯葬濟陰丘壠皆小葬具甚微舜葬蒼梧
二妃不從禹葬會稽不改其列

不改樹木百
物之列也

殷湯無葬

處

謂不見
傳記也

文武周公葬於畢秦穆公葬於雍橐泉宮祈

年館下槨里子葬於武庫皆無丘壠之處此聖帝明王
賢君智士遠覽獨慮無窮之計也其賢臣孝子亦承命

順意而薄葬之此誠奉安君父忠孝之至也夫周公武
王弟也葬兄甚微孔子葬母於防稱古墓而不墳曰丘
東西南北之人也不可不知識也為四尺墳遇雨而崩弟
子修之以告孔子孔子流涕曰吾聞之古者不修墓蓋
非之也延陵季子適齊而反其子死葬於贏博之間邑二
穿不及泉歛以時服封墳掩坎其高可隱隱蔽之財而
號曰骨肉歸復於土命也魂氣則無不之也夫贏博去
吳千有餘里季子不歸葬孔子往觀曰延陵季子於禮

合矣故仲尼孝子而延陵慈父舜禹忠臣周公弟弟其
葬君親骨肉皆微薄矣非苟為儉誠便於體也宋桓司
馬為石槨仲尼曰不如速朽秦相呂不韋集知畧之士
而造春秋亦言薄葬之義皆明於事情者也逮至吳王
闔閭違禮厚葬十有餘年越人發之及秦惠文武昭嚴
襄五王皆大作丘隴多其瘞臧咸盡發掘暴露其足悲
也秦始皇帝葬於驪山之阿下銅三泉上崇山墳其高
五十餘丈周回五里有餘石槨為游館人膏為燈燭水

銀為江海黃金為鳬鴈珍寶之藏機械之變棺槨之麗

宮館之盛不可勝原又多殺宮人生薶工匠計以萬數

天下苦其役而反之驪山之作未成而周章百萬之師

至其下矣

周章陳勝之將

項籍燔其宮室營宇往者咸見發掘

其後牧兒亡羊羊入其鑿

鑿謂所穿家賊者○在到反

牧者持火照

求羊失火燒其臧擲自古至今葬未有盛如始皇者也

數年之間外被項籍之災內離牧豎之禍豈不哀哉是

故德彌厚者葬彌薄知愈深者葬愈微無德寡知其葬

愈厚丘壠彌高宮廟其麗發掘必速由是觀之明暗之
效葬之吉凶昭然可見矣周德既衰而奢侈宣王賢而
中興更為儉宮室小寢廟詩人美之斯千之詩是也雅小
篇名美宣王考室上章道宮室之如制下章言子孫之衆多也

及魯嚴公即莊公也刻飾宗廟多築臺囿後嗣再絕春秋刺

焉周宣如彼而昌魯秦如此而絕是則奢儉之得失也

陛下即位躬親節儉始營初陵其制約小天下莫不稱

賢明及徙昌陵增埤為高埤下也積土為山發民墳墓

○音埤

積以萬數營起邑居期日迫卒功費大萬百餘

大萬億也大巨

也死者恨於下生者愁於上怨氣感動陰陽因之以饑

饑物故流離以十萬數臣甚懼焉以死者為有知發人之墓其害多矣若其無知又安用大謀之賢知則不說以示衆庶則苦之若苟以說愚夫淫侈之人又何為哉陛下慈仁篤美甚厚聰明疏達蓋世宜弘漢家之德崇劉氏之美光昭五帝三王而顧與暴秦亂君競為奢侈北方丘壠說愚夫之目隆一時之觀違賢知之心亡萬

世之安臣竊為陛下羞之唯陛下上覽明聖黃帝堯舜禹湯文武周公仲尼之制下觀賢知穆公延陵樗里張釋之之意孝文皇帝去墳薄葬以儉安神可以為則秦昭始皇增山厚臧以侈生害足以為戒初陵之撫撫與模同

宜從公卿大臣之議以息眾庶疏上成帝甚感向言而不從其計

極諫外家封事

時上無繼嗣政由王氏出災異浸甚向上封事極諫

臣聞人君莫不欲安然而常危莫不欲存然而常亡失御臣之術也夫大臣操權柄持國政未有不為害者也

昔晉有六卿

智伯范中行韓魏趙也

齊有田崔衛有孫甯魯有季

孟常掌國事世執朝柄終後田氏取齊六卿分晉崔杼

弑其君光孫林父甯殖出其君衍弑其君剽季氏八佾

舞於庭三家者以雍徹並專國政卒逐昭公周大夫尹

氏筦朝事

筦與管同

濁亂王室子朝子猛更立連年乃定故

經曰王室亂又曰尹氏殺王子克甚之也春秋舉成敗

錄禍福如此類甚衆皆陰盛而陽微下失臣道之所致

也故書曰臣之有作威作福害于而家凶于而國

周書洪範

也孔子曰祿去公室政逮大夫危亡之兆秦昭王舅穰

侯及涇陽葉陽君

皆昭王母之弟也穰侯魏冉也涇陽葉陽皆其弟○葉式涉反

專國

擅執上假太后之威三人者權重於昭王家富於秦國

國甚危殆賴寤范雎之言而秦復存二世委任趙高專

權自恣壅蔽大臣終有閭樂望夷之禍秦遂以亡近事

不遠即漢所代也漢興諸呂無道擅相尊王呂產呂祿

席太后之寵據將相之位兼南北軍之衆擁梁趙王之

尊驕盈無厭欲危劉氏賴忠正大臣絳侯朱虛侯等竭

誠盡節以誅滅之然後劉氏復安今王氏一姓乘朱輪

華轂者二十三人青紫貂蟬充盈幄內魚鱗左右

言在帝之

左右相次若魚鱗也

大將軍秉事用權五侯驕奢僭盛並作威福

擊斷自恣行汙而寄治身私而託公依東宮之尊假甥

舅之親以為威重

東宮太后所居也

尚書九卿州牧郡守皆出

其門筦執樞機朋黨比周稱譽者登進忤恨者誅傷游
談者助之說執政者為之言排擯宗室孤弱公族其有
智能者尤非毀而不進遠絕宗室之任不令得給事朝

省恐其與已分權數稱燕王蓋主以疑上心

示宗室親近而反逆

也避諱呂霍而弗肯稱

呂后霍后二家皆坐僭擅誅滅故為王氏諱而不言也

內

有莞蔡之萌外假周公之論兄弟據重宗室磐互

磐結而交

互也歷上古至秦漢外戚僭貴未有如王氏者也雖周皇

甫秦穰侯漢武安呂霍上官之屬皆不及也

皇甫周卿士字也事

見小雅十月之交篇武安侯田蚡也

物盛必有非常之變先見為其人微

象孝昭帝時冠石立於泰山

冠山之下有石自立三石為足一石在上故曰冠石

也仆柳起於上林

其樹已死僵仆於地而更起生

而孝宣帝即位今王

氏先祖墳墓在濟南者其梓柱生枝葉扶疏上出屋根

垂地中雖立石起柳無以過此之明也事執不兩大王

氏與劉氏亦且不並立如下有泰山之安則上有累卵

之危陛下為人子孫守持宗廟而令國祚移於外親降

為阜隸縱不為身奈宗廟何婦人內夫家外父母家此

亦非皇太后之福也孝宣皇帝不與舅平昌樂昌侯權

平昌侯王無故所以全安之也夫明者起福於無形銷

樂昌侯王武

患於未然宜發明詔吐德音接近宗室親而納信黜遠

外戚毋授以政皆罷令就第以則效先帝之所行厚安
外戚全其宗族誠東宮之意外家之福也王氏永存保
其爵祿劉氏長安不失社稷所以褒睦外內之姓子子
孫孫無疆之計也如不行此策田氏復見於今六卿必
起於漢為後嗣憂昭昭甚明不可不深圖不可不早慮
易曰君不密則失臣臣不密則失身幾事不密則害成
上繫之
辭也 唯陛下深畱聖思審固幾密覽往事之戒以折

中取信居萬安之實用保宗廟久承皇太后天下幸甚

書奏天子召見向歎息悲傷其意謂曰
君且休矣吾將思之以向為中壘校尉

定禮樂疏

成帝時犍為郡於水濱得古磬十六枚議者以為善祥劉向因是說上

宜興辟雍設庠序陳禮樂隆雅頌之聲盛揖讓之容以
風化天下如此而不治者未之有也或曰不能具禮禮
以養人為本如有過差是過而養人也刑罰之過或至
死傷今之刑非臯陶之法也而有司請定法削則削筆
則筆救時務也至於禮樂則曰不敢是敢於殺人不敢
於養人也為其俎豆莞絃之間小不備因是絕而不為

是去小不備而就大不備大不備或莫甚焉夫教化之
比於刑法刑法輕是舍所重而急所輕也且教化所恃
以為治也刑法所以助治也今廢所恃而獨立其所助
非所以致太平也自京師有諍逆不順之子孫至於陷
大辟受刑戮者不絕繇不習五常之道也夫承千歲之
衰周繼暴秦之餘敝民漸漬惡俗貪饕險詖不閑義理
不示以大化而獨毆以刑罰終已不改故曰導之以禮
樂而民和睦初叔孫通將制定禮儀見非於齊魯之士

然卒為漢儒宗業垂後嗣斯成法也

杜欽

字子夏南陽杜衍人好經書與茂陵杜鄴同姓欽為大將軍軍武庫令

訟馮奉世疏

奉世以衛侯使持節送大宛諸國客以便宜發諸國兵討殺莎車王

威振西域不得封死後二年甘延壽以誅郅支單于封為列侯於是欽上疏追訟奉世前功

前莎車王殺漢使者約諸國背畔左將軍奉世以衛侯便宜發兵誅莎車王策定城郭功施邊竟

城郭者謂西域諸國為城

郭而議者以奉世奉使有指春秋之義亡遂事漢家之

法有矯制故不得侯今匈奴支單于殺漢使者亡保
康居都護延壽發城郭兵屯田吏士四萬餘人以誅斬
之封為列侯臣愚以為比罪則郅支薄量敵則莎車衆
用師則奉世寡計勝則奉世為功於邊竟安慮敗則延
壽為禍於國家深其違命而擅生事同延壽割地封而
奉世獨不錄臣聞功同賞異則勞臣疑罪鈞刑殊則百
姓惑疑生無常惑生不知所從亡常則節趨不立
趨謂意所
嚮不知所從則百姓無所措手足奉世圖難忘死信命

殊俗國難謀除國難也

成功白著為世使表

白著謂顯明也表猶首

獨抑

厭而不揚非聖主所以塞疑厲節之意也願下有司議

元帝以先帝時事不復錄

翼奉

字少君東海下邳人治齊詩好律歷陰陽之占元帝時徵侍詔後為諫大夫

應直言封事

時地震赦天下舉直言極諫之士奉奏封事

臣聞之於師曰天地設位懸日月布星辰分陰陽定四時列五行以視聖人名之曰道聖人見道然後知王治之象故畫州土建君臣立律歷陳成敗以視賢者名之

曰經賢者見經然後知人道之務則詩書易春秋禮樂

是也易有陰陽詩有五際

詩內傳曰五際卯酉午戌亥也陰陽終始際會之歲於此

則有變改之政也

春秋有災異皆列終始推得失考天心以言

王道之安危至秦乃不說傷之以法是以大道不通至

於滅亡今陛下明聖深懷要道燭臨萬方布德流惠靡

有闕遺罷省不急之用振救困貧賦賢樂賜棺錢恩澤

甚厚又舉直言求過失盛德純備天下幸甚臣奉竊學

齊詩聞五際之要十月之交篇

小雅篇名也

知日蝕地震之

效昭然可明猶巢居知風穴處知雨亦不足多適所習

耳臣聞人氣內逆則感動天地天變見於星氣日蝕地

變見於奇物震動所以然者陽用其精陰用其形猶人

之有五藏六體五藏象天六體象地故藏病則氣色發

於面體病則欠申動於貌今年太陰建於甲戌律以庚

寅初用事歷以甲午從春

太陰在甲戌則太歲在子十一月庚寅日黃鍾律初起用

事也歷中甲庚律得參陽性中仁義情得公正貞廉

甲庚皆三

陽甲在東方為仁庚在西方為義戌為公正寅午為廉貞

百年之精歲也正以精歲

本以王位也春日臨終時接律而地大震其後連月久陰

雖有大令猶不能復

大令謂虛倉廩開府庫之屬也復補也

陰氣盛矣古

者朝廷必有同姓以明親親必有異姓以明賢賢此聖王之所以大通天下也同姓親而易進異姓疏而難通故同姓一異姓五廼為平均今左右亡同姓獨以舅后之家為親異姓之臣又疏二后之黨滿朝非特處位執尤奢僭過度呂霍上官足以卜之甚非愛人之道又非後嗣之長策也陰氣之盛不亦宜乎臣又聞未央建章

乃奏顯舊惡請免
顯等尊於是劾奏

丞相衡御史大夫譚位三公典五常九德

九德見
臯陶謨

以總

方畧壹統類廣教化美風俗為職知中書謁者令顯等
專權擅執大作威福縱恣不制無所畏忌為海內患害
不以時白奏行罰而阿諛曲從附下罔上懷邪迷國無
大臣輔政之義皆不道在赦令前赦後衡譚舉奏顯不
自陳不忠之罪而反揚著先帝任用傾覆之徒妄言百
官畏之甚於主上卑君尊臣非所宜稱失大臣體又正

月行幸曲臺臨饗罷衛士

諸衛士更盡得代去故天子自臨而饗之

衡與中

二千石大鴻臚賞等會坐殿門下衡南鄉賞等西鄉衡

更為賞布東鄉席起立延賞坐私語如食頃衡知行臨

天子當臨饗士時

百官共職萬衆會聚而設不正之席使下坐

上相比為小惠於公門之下動不中禮亂朝廷爵秩之

位衡又使官大奴入殿中問行起居還言漏上十四刻

行臨到衡安坐不變色改容無怵惕肅敬之心驕慢不

謹皆不敬

有詔勿治於是衡慙懼免冠謝罪

公乘興

湖三老

訟王尊書

尊為京兆尹坐事免吏民多稱惜之公乘興等上書訟尊治京兆功效

往者南山盜賊阻山橫行剽劫良民殺奉法吏道路不通城門至以警戒步兵校尉使逐捕暴師露衆曠日煩

費不能禽制二卿坐黜

三輔皆秩中二千石號為卿也即京兆王昌貶為雁門太守甄

遵河內太守也

羣盜竊彊吏氣傷沮流聞四方為國家憂當此

之時有能捕斬不愛金爵重賞關內侯寬中使問所徵故司隸校尉王尊捕羣盜方畧拜為諫大夫守京輔都

尉行京兆尹事尊盡節勞心夙夜思職卑體下士厲奔
北之吏起沮傷之氣二旬之間大黨震壞渠率效首賊
亂蠲除民反農業拊循貧弱鉏耰豪強長安宿豪大猾
東市賈萬城西萬章箭張禁酒趙放

箭張禁酒趙放此
二人作箭作酒之

家○萬
音矩

杜陵楊章等皆通邪結黨挾養姦軌上千王法

下亂吏治并兼役使侵漁小民為百姓豺狼更數二千
石二十年莫能禽討尊以正法案誅皆伏其辜姦邪銷
釋吏民說服尊撥劇整亂誅暴禁邪皆前所稀有名將

所不及雖拜為真未有殊絕寔賞加於尊身今御史大

夫奏尊傷害陰陽為國家憂無承用詔書之意靖言庸

違象恭滔天

引虞書堯典之辭

原其所以出御史丞楊輔故為

尊書佐素行陰賊惡口不信

謂其口惡而心不信也

好以刀筆陷

人於法輔常醉過尊大奴利家利家梓搏其頰

梓持頭也○才

元反兄子閔拔刀欲剄之輔以故深怨疾毒欲傷害尊疑

輔內懷怨恨外依公事建畫為此議傳致奏文浸潤加

誣以復私怨昔白起為秦將東破韓魏南拔郢都應侯

譖之賜死杜郵吳起為魏守西河而秦韓不敢犯讒人
間焉斥逐奔楚秦聽浸潤以誅良將魏信讒言以逐賢
守此皆偏聽不聰失人之患也臣等竊痛傷尊修身絜
已砥節首公刺譏不憚將相誅惡不避豪彊誅不制之
賊解國家之憂功著職修威信不廢誠國家爪牙之吏
折衝之臣今一旦無辜制於仇人之手傷於詆欺之文
上不得以功除罪下不得蒙棘木之聽

周禮三槐九棘
公卿於下聽訟

獨掩怨讎之偏奏猥被共工之大惡無所陳怨愬罪尊

以京師廢亂羣盜並興選賢徵用起家為卿賊亂既除
豪猾伏辜即以佞巧廢黜一尊之身三期之間乍賢乍
佞豈不甚哉

期年也

孔子曰愛之欲其生惡之欲其死是

惑也浸潤之譖不行焉可謂明矣願下公卿大夫博士

議即定尊素行夫人臣而傷害陰陽死誅之罪也靖言

庸違放殛之刑也審如御史章尊乃當伏觀闕之誅

孔子

誅少正卯於兩觀之間

放於無人之域不得苟免及任舉尊者當

獲選舉之辜不可但已即不如章飾文深詆以愬無罪

亦宜有誅以懲讒賊之口絕詐欺之路唯明主參詳使

白黑分別

書奏天子復以尊為徐州刺史遷東郡太守

劉輔

河間宗室為諫大夫

諫立趙婕妤疏

成帝欲立趙婕妤為皇后輔上疏

臣聞天之所與必先賜以符瑞天之所違必先降以災

變此神明之徵應自然之占驗也昔武王周公承順天

地以饗魚鳥之瑞

謂伐紂時有自然赤鳥之瑞也

然猶君臣祇懼動色

相戒況於季世不蒙繼嗣之福屢受威怒之異者乎雖

夙夜自責改過易行畏天命念祖業妙選有德之世考
卜窈窕之女以承宗廟順神祇心塞天下望子孫之祥
猶恐晚暮今乃觸情縱欲傾於卑賤之女欲以母天下
不畏於天不媿於人惑莫大焉里語曰腐木不可以為
柱卑人不可以為主天人之所不予必有禍而無福市
道皆共知之朝廷莫肯壹言臣竊傷心自念得以同姓
拔擢尸祿不忠污辱諫爭之官不敢不盡死唯陛下深
察

谷永

字子雲長安人
歷官大司農

祭祀方術奏

成帝末年頗好鬼神上書言祭祀方術者皆得待詔永因上奏

臣聞明於天地之性不可惑以神怪知萬物之情不可罔以非類諸背仁義之正道不遵五經之法言而盛稱奇怪鬼神廣崇祭祀之方求報無福之祠及言世有僊人服食不終之藥造興輕舉造古遙字遠也興起也登遐倒景在

月之上反從下照故其景倒

覽觀縣圃浮游蓬萊

崑崙九成土有縣圃縣圃之上即閭

闔天門耕耘五德朝種暮穫

翼氏風角五德東方甲南方丙西方庚北方壬中央戊種

五色禾於此與山石無極

言獲長壽比於山石無窮也

黃治變化者

鑄黃金也道家言治丹砂

堅冰淖溺

方士詐以藥石若陷冰丸投之冰上

冰即消因假為神仙道使然也○淖女教反

化色五倉之術

思身中有五色腹中有五倉神

五色存則不死五倉存則不饑

皆姦人惑衆挾左道懷詐偽以欺罔世

主聽其言洋洋滿耳若將可遇求之盪盪如係風捕景

終不可得是以明王距而不聽聖人絕而不語昔周史

萇弘欲以鬼神之術輔尊靈王會朝諸侯而周室愈微

諸侯愈叛楚懷王隆祭祀事鬼神欲以獲福助卻秦師

而兵挫地削身辱國危秦始皇初并天下甘心於神僊之道遣徐福韓終之屬多齎童男童女入海求神采藥因逃不還天下怨恨漢興新垣平齊人少翁公孫卿樂大等皆以僊人黃冶祭祠事鬼使物入海求僊采藥貴幸賞賜累千金大尤尊盛至妻公主爵位重系震動海內元鼎元封之際燕齊之間方士瞋目扼腕言有神僊祭祀致福之術者以萬數其後平等皆以術窮詐得誅夷伏辜至初元中有天淵玉女鉅鹿神人轅陽侯師張

宗之姦紛紛復起

轅陽侯江仁也元帝時坐使家丞上印綬隨宗學僊免官○轅音遼夫

周秦之末三五之隆已嘗專意散財厚爵祿竦精神舉

天下以求之矣曠日經年靡有毫釐之驗足以揆今經

曰享多儀儀不及物惟曰不享論語說曰子不語怪神

唯陛下距絕此類毋令姦人有以窺朝者

永數上封事尤善言災異

然專攻上身與後宮而黨於王氏杜欽杜鄴對策亦然俱無取焉獨此篇與訟陳湯疏持論甚正錄之

訟陳湯疏

成帝初匡衡奏湯奉使時盜康居財物坐免後湯上書言康居王侍子非

王子也按驗實王子

下獄當死永上疏

臣聞楚有子玉得臣文公為之仄席而坐

事詳左傳

趙有廉

頗馬服彊秦不敢窺兵井陘

廉頗馬服君趙奢趙將也井陘之口趙之西界山險

道近漢有邳都魏尚匈奴不敢南鄉沙幕由是言之戰也

克之將國之爪牙不可不重也蓋君子聞鼓輦之聲則

思將率之臣

樂記曰君子聽鼓輦之聲則思將率之臣

竊見關內侯陳湯前

使副西域都護忿邳支之無道閔王誅之不加策慮愾

億義勇奮發

愾億憤怒之貌愾皮逼反

卒興師奔逝橫厲烏孫踰

集都賴

踰遠也遠集邳支都賴水上也踰讀曰遙

屠三重城斬邳支首報十

年之逋誅雪邊吏之宿耻威震百蠻武暢西海漢元以來征伐方外之將未嘗有也今湯坐言事非是幽囚久

繫歷時不決執憲之吏欲致之大辟昔白起為秦將南

拔郢都北阮趙括以纖介之過賜死杜郵

在咸陽西

秦民憐

之莫不隕涕今湯親秉鉞席卷喋血萬里之外薦功祖

廟告類上帝介冑之士靡不慕義以言事為罪無赫赫

之惡周書曰記人之功忘人之過宜為君者也

尚書之外逸書

也夫犬馬有勞於人尚加帷蓋之報

禮記稱孔子云敝帔弗棄為羶馬也

敝蓋弗棄
為羶狗也

況國之功臣者哉竊恐陛下忽於鼓輦之聲

不察周書之意而忘帷蓋之施庸臣遇湯卒從吏議使

百姓介然有秦民之恨非所以厲死難之臣也

書奏天子出湯

奪爵為士伍

梅福

字子真九江壽春人為南昌尉後去官居家以讀書養性為事至王莽顯政一朝棄妻子

去九江人傳以為仙後有見福於會稽者變名姓為吳市門卒云

言王氏書

時成帝委任大將軍王鳳鳳專執擅朝而京兆尹王章素忠直譏刺鳳為

鳳所誅王氏浸盛災異數見羣下莫敢正言福乃上書

臣聞箕子佯狂於殷而為周陳洪範叔孫通遁秦歸漢
制作儀品夫叔孫先非不忠也箕子非疏其家而畔親
也不可為言也昔高祖納善若不及從諫若轉圜聽言
不求其能舉功不考其素陳平起於亡命而為謀主韓
信拔於行陳而建上將故天下之士雲合歸漢爭進奇
異知者竭其策愚者盡其慮勇士極其節怯夫勉其死
合天下之知并天下之威是以舉秦如鴻毛取楚若拾
遺此高祖所以亡敵於天下也孝文皇帝起於代谷非

有周召之師伊呂之佐也循高祖之法加以恭儉當此之時天下幾乎繇是言之循高祖之法則治不循則亂何者秦為亡道削仲尼之迹滅周公之軌壞井田除五等禮廢樂崩王道不通故欲行王道者莫能致其功也孝武皇帝好忠諫說至言出爵不待廉茂慶賜不須顯功是以天下布衣各厲志竭精以赴闕廷自銜鬻者不可勝數漢家得賢於此為盛使孝武皇帝聽用其計升平可致於是積尸暴骨快心胡越故淮南王安緣間而

起所以計慮不成而謀議泄者以衆賢聚於本朝故其

大臣執陵不敢和從也

臣執陵君也謂淮南大臣相內史之屬

方今布衣

廼窺國家之隙見間而起者蜀郡是也

成帝鴻嘉中廣漢男子鄭躬等

反是也及山陽亡徒蘇令之羣蹈藉名都大郡求黨與索

隨和

求索與已和及隨已者

而亡逃匿之意此皆輕量大臣亡所

畏忌國家之權輕故匹夫欲與上爭衡也士者國之重

器得士則重失士則輕詩云濟濟多士文王以寧

大雅文王

詩之廟堂之議非草茅所當言也臣誠恐身塗野草尸并

卒伍故數上書求見輒報罷臣聞齊桓之時有以九九

見者桓公不逆欲以致大也

九九算書若今九章五曹之輩

今臣所言

非特九九也陛下距臣者三矣此天下士所以不至也

昔秦武王好力任鄙叩關自鬻

秦武王孝公之孫惠文王之子也任鄙力士也

繆公行伯繇余歸德今欲致天下之士民有上書求見

者輒使詣尚書問其所言言可采取者秩以升斗之祿

賜以一束之帛若此則天下之士發憤懣吐忠言嘉謀

日聞於上天下條貫國家表裏爛然可睹矣夫以四海

之廣士民之數能言之類至衆多也然其雋桀指世陳
政言成文章質之先聖而不繆施之當世合時務若此
者亦亡幾人故爵祿東帛者天下之底石高祖所以厲
世摩鈍也孔子曰工欲善其事必先利其器至秦則不
然張誹謗之罔以為漢毆除倒持泰阿授楚其柄

太阿劍名

歐冶所鑄也

故誠能勿失其柄天下雖有不順莫敢觸其鋒

此孝武皇帝所以辟地建功為漢世宗也今不循伯者
之道廼欲以三代選舉之法取當時之士猶察伯樂之

圖求騏驥於市而不可得亦已明矣故高祖棄陳平之

過而獲其謀晉文召天王齊桓用其讎亡益於時不顧

逆順此所謂伯道者也一色成體謂之純白黑雜合謂

之駁欲以承平之法治暴秦之緒猶以鄉飲酒之禮理

軍市也今陛下既不納天下之言又加戮焉夫戴鵲遭

害則仁鳥增逝

戴鵲也仁鳥鸞鳳也○戴音緣

愚者蒙戮則知士深退

間者愚民上疏多觸不急之法或下廷尉而死者衆自

陽朔以來天下以言為諱朝廷尤甚羣臣皆承順上指

莫有執正何以明其然也取民所上書陛下之所善試

下之廷尉廷尉必曰非所宜言大不敬以此卜之一矣

故京兆尹王章資質忠直敢面引廷爭孝元皇帝擢之

以厲具臣而矯曲朝及至陛下戮及妻子且惡惡止其

身王章非有反畔之辜而殃及家折直士之節結諫臣

之舌羣臣皆知其非然不敢爭天下以言為戒最國家

之大患也願陛下循高祖之軌杜亡秦之路數御十月

之歌

福譏切王氏十月之詩刺后族太盛也小雅十月之交篇也

畱意亡逸之戒

周書

篇除不急之法下亡諱之詔博覽兼聽謀及疏賤令深

者不隱遠者不塞所謂辟四門明四目也且不急之法

誹謗之微者也往者不可及來者猶可追方今君命犯

而主威奪君命犯者謂大臣犯君之命外戚之權日以益隆陛下不

見其形願察其景建始以來日食地震以率言之三倍

春秋水災亡與比數陰盛陽微金鐵為飛此何景也河平

二年沛郡缺官鑄缺如星飛權臣用事之異也漢興以來社稷三危呂霍上官

皆母后之家也親親之道全之為右當與之賢師良傅

教以忠孝之道今廼尊寵其位授以魁柄

以斗為喻也
斗身為魁

使之驕逆至於夷滅此失親親之大者也自霍光之賢不能為子孫慮故權臣易世則危書曰毋若火始燄燄

周書洛誥之辭

執陵於君權隆於主然後防之亦亡及已

請封孔子世為殷後書

成帝久無繼嗣福以為
宜建三統封孔子之世

以為
殷後

臣聞不在其位不謀其政政者職也位卑而言高者罪也越職觸罪危言世患雖伏質橫分臣之願也守職不

言沒齒身全死之日尸未腐而名滅雖有景公之位伏

歷千駟

歷與
握同

臣不貪也故願壹登文石之陛涉赤墀之

塗當戶牖之法坐

戶牖之間謂之扆也法
坐正坐也聽朝之處

盡平生之愚

慮亡益於時有遺於世此臣寢所以不安食所以忘味

也願陛下深省臣言臣聞存人所以自立也壅人所以

自塞也善惡之報各如其事昔者秦滅二周夷六國隱

士不顯佚民不舉絕三統滅天道是以身危子殺厥孫

不嗣所謂壅人以自塞者也故武王克殷未下車存五

帝之後封殷於宋紹夏於杞明著三統示不獨有也是以姬姓半天下遷廟之主流出於戶

言其多

所謂存人自

立者也今成湯不祀殷人亡後陛下繼嗣久微殆為此也春秋經曰宋殺其大夫穀梁傳曰其不稱名姓以其

在祖位尊之也

事在僖二十五年穀梁所云在祖位者謂孔子本宋孔父之後防叔奔魯遂為

魯人今宋所殺者亦孔父之後畱在宋者於孔子為祖列故尊而不名也此言孔子故殷後

也雖不正統封其子孫以為殷後禮亦宜之何者諸侯

奪宗聖庶奪嫡

奪宗始封之君尊為諸侯則奪其舊為宗子之事也奪適文王舍伯邑考而立

武王是也孔子

傳曰賢者子孫宜有土而況聖人又殷

雖庶可為殷後

後哉昔成王以諸侯禮葬周公而皇天動威雷風著災

今仲尼之廟不出闕里孔氏子孫不免編戶以聖人而

歆匹夫之祀非皇天之意也今陛下誠能據仲尼之素

功以封其子孫

素功素王之功也穀梁傳曰孔子素王

則國家必獲其福

又陛下之名與天亡極何者追聖人素功封其子孫未

有法也後聖必以為則不滅之名可不勉哉

成帝綏和元年立二

王後遂下詔封孔子世為殷紹嘉公



御選古文淵鑒卷十五



總校官庶吉士臣張能照

校對官助教臣汪錫魁

謄錄監生臣沈浩